

LEWANEWS

Leselinyana la Lekhotla la Taolo ea Motlakase le Metsi Lesotho

SEPHETHO SA LITEFISO
LE LITHEKO TSA LEC
TSA 2020/21 SE EA
PHATLALATSOA
page 3

FALLA SEBOKO
E NE E LE MORATOA
KE BOHLE
page 14

MEKHOA EA HO
FOKOTSA LE HO LAOLA
SEKHAHLA SA
TŠOAETSANO
EA COVID-19
page 5

LIPOTSO
TSE BOTSOANG HA
NGATA HOLIMA
LITJEO TSA
MOTLAKASE
page 6

LEWA E FANYEHA PHATLALATSO
EA KOPO EA WASCO EA HO
NYOLLA LITHEKO LE LITEFISO
TSA SELEMO SA 2020/21




U tšoenyehile ka
Phepelo ea Motlakase?
Hape le...

**Likhakanyo tsa khokelo ea motlakase ♦ Khokelo ea
motlakase ♦ Khaolo ea phepelo ea motlakase ♦
Khokelo ♦ Khaolo ea phepelo e bakiloeng ke
bothata ba marang-rang a LEC?**

Lekhotla la Taolo ea Motlakase le Metsi Lesotho (LEWA) le hlahisitse litokomane tseo taolo ea motlakase etlang ho phethahatsoa ka tsona. Hara tse ling, Lekhotla le hlahisitse tokomane ea Lipehelo tsa Boleng ba Litšebeletso le Phepelo ea Motlakase (QoSSS). Tokomane ena e tataisa K'hamphani ea Motlakase Lesotho (LEC) hore e fane ka litšebeletso e ipapisitse le lipehelo tse behiloeng tse kahar'a eona. Tokomane ea QoSSS e kene tšebetsong ho tloha ka 2007.

Molemong oa litšebeletso tse phethahetseng holim'a motlakase Lesotho.





LEWANews

LESOTHO
ELECTRICITY & WATER
AUTHORITY

7 Floor, Moposo House, Kingsway
Private Bag A315 • Maseru
Maseru • Lesotho
Tel: +266 22312479
Fax: +266 22315094
E-mail: secretary@lewa.org.ls
Website: www.lewa.org.ls

Lesotho Electricity and Water Authority –LEWA
 [officialLEWA_1](https://twitter.com/officialLEWA_1)

CHIEF EXECUTIVE
Motlatsi Ramafale
Email: MRamafale@lewa.org.ls

CONSUMER AFFAIRS
& COMMUNICATION MANAGER
Shao Khatala
Email: skhatala@lewa.org.ls

PUBLIC RELATIONS OFFICER
Sebusi Khanyela
Email: skhanyela@lewa.org.ls

LEWA NEWS is the newsletter of the
Lesotho Electricity and Water Authority.
It is published in English and Sesotho
It is distributed free of charge
to stakeholders.

The opinions expressed in it are not
necessarily those of LEWA and the
inclusion of an advertisement implies
no endorsement of any kind by LEWA.
The contents of the publication may be
reproduced free of charge on condition
that acknowledgement is given
to LEWA NEWS.

Please allow some time from receipt
of LEWA NEWS for additions to,
deletions from or changes in the
mailing/distribution list.

Copyright © LEWANews 2020

LETHATHAMO

SELELEKELA KA MOOKAMELI 2

PHATLALATSO EA LITHEKO TSA MOTLAKASE TSA
LEC TSA SELEMO SA 2020/21 3

MEKHOA EA HO FOKOTSA LE HO LAOLA
SEKHAHLA SA TŠOAETSANO EA COVID-19 5

LIPOTSO TSE BOTSOANG HA NGATA HOLIMA
LITJEO TSA MOTLAKASE 6

MONGOLI E MOHOLO OA LEKALA LA MATLA LE
BOLEPI O ETELA LEWA 8

METHATI E LATELOANG HO RAROLLA LITLETLEBO 9

LEWA E FANYEHA PHATLALATSO EA KOPO EA
WASCO EA HO NYOLLA LITHEKO LE LITEFISO
TSA SELEMO SA 2020/21 10

TSEBA HAHOLOANYANE KA LITABA TSA TAOLO: MOLAOANA
OA LILAKSENSE TSA MOTLAKASE- LESOTHO ELECTRICITY
AUTHORITY (APPLICATION FOR LICENCES) RULES, 2012 12

FALLA SEBOKO E NE E LE MORATO A KE BOHLE 14

Selelekela ka Mookameli

Kea le lumelisa le ho le amohela leselinyaneng lena la Lekhotla la Taolo ea Motlakase le Metsi Lesotho (LEWA). Ke tšepa hore le ntse le ipolokile boemong bona bo bocha boo re phelang kahare ho bona ka lebaka la seoa sa COVID-19. Ntoa khahlanong le bohloko bona ha e so fele 'me ke le kopa hore le latele litataiso tsohle hore le lule le bolokehile.

Ha ho tika-tiko hore seoa sena se fetotse tsela eo lintho li neng li le ka teng lefapheng la taolo ea motlakase le la metsi le likhoerekhoere metseng ea literopo. Sena se entse hore basebelisi ba litšebeliso ba tsoenyehe hore ho ka ba le bothata ba phumantšo ea litšebeliso. Litšebeliso tsohle mafapheng a laoloang li tla 'ne li fumanehe le nakong ena ea COVID-19. Taba ea bohlokoa ke hore bohle ba tsoele pele ho lefella mekoloto ea bona ka nako. Ho ipoloka nakong ena ke taba ea bohlokoa haholo.

Leselinyana lena le phuthetse lintlha le lietsahala tsa LEWA hammoho le tsa thuto litabeng tsa taolo. Tse phuthetsoeng ke leselinyana lena li kenyetsetsa lintlha tse latelang; phatlalatso ea Kopo ea litheko tsa motlakase tsa selemo sa 2020/21 hammoho le phanyeho ea phatlalatso ea Kopo ea K'hamphani ea Metsi le Likhoerekhoere (WASCO), mekhoha ea ho laola sekhahla sa tsoaetsano ea COVID-19, ketelo ea Mongoli e Moholo oa Lekala la Matla le Bolepi (MEM), Monghali Tankiso Phapano hammoho le fonaniso ea Monghali Falla Seboko eo e neng e le Mookameli Lefapheng la Taolo ea Metsi (M-TRW). Lintlha tse reretsoeng ho ruta sechaba li kenyetsetsa; Methati ea ho teka litletlebo ho LEWA, lipotso tse botsoang hangata holim'a litjeo tsa motlakase hammoho le Molaoana oa Lilaksense tsa Motlakase (put the official title in English for ease of reference). E ntse e le ho kenya letsoho toantšong ea COVID-19, mekhoha ea ho ithokomela e nehelanoeng ke Mokhatlo oa Lefatše oa Bophelo (WHO) hammoho le Lekala la Bophelo (MoH) e manollotsoe.

Joalokaha ho hlalositsoe pejana, LEWA e ile ea fumana Kopo ea ho nyolla litheko tsa Selema sa 2020/21 ho tsoa K'hamphaneng ea Motlakase Lesotho (LEC), moo teng e ne e kopile chelete ea tšebetso e kaalo ka M1.21 billion e leng keketso ea linoko tse 32.6 lekholong. Lekhotla le ile la fana ka sephetho sa Kopo eo ka Phupu 2020. Ka ho le leng, WASCO le eona e ile ea teka Kopo ea eona. K'hamphane e ne e kopile chelete ea tšebetso e kaalo ka limilione tse M239.85 hammoho le nyollo ea litefiso tsa sekhahla sa tšebeliso ea metsi ka linoko tse 3.0 lekholong. Lekhotla le ile la phatlalatsa hore le tla nts'a qeto ea mapomelo



qetellong ea Selema sa 2020/21. LEWA e ile ea tsoara mokete oa ho lumelisa Monghali Falla Seboko ea sebelelit-seng Lekhotla ho tloha ka 2012 e le Ofisiri ea Tlhahlobo ea Metsi. Ke moo teng qetellong ea 2012, a ileng a thonyetsoa ho ba Mookameli oa Lefapha la Taolo ea Metsi (TRW-D). Lekhetlong la pele nalaneng, Lekhotla le ile la fumana ketelo ea Mongoli e Moholo oa MEM e leng Monghali Phapano. Lekhotla le boetse le hlalositse methati ea ho rarolla litletlebo tse sa khonoang ho rarolla ke litsi tse boliseng ba eona. E ntse e le mokhoa oa kanetso ea thuto ho sechaba, bohlokoa ba ho kenya letsoho litabeng tse amanang le phatlalatso ea Kopo ea ho nyolla litheko tsa motlakase le metsi li hlalositsoe. Lekhotla le boetse le hlalositse tokomane ea molaoana/tataiso oa lilaksense tsa motlakase (Kopo ea lilaksense) tsa selema sa 2012. Tokomane ena ea Tataiso e hlalosa methati eo likhoebos tse nang le khahleho ea ho kena lefapheng la taolo ea motlakase li lokeloang ho e latela hore mangolo a tumello a tsona ea tšebetso a ananeloe ke LEWA.

Phatlalatso ea liphetho tsena e tobokelitse bohlokoa ba LEWA taolong ea ESI le UWSS. LEWA e thehetsoe hore e sireletse basebelisi ba litšebeliso khahlanong le litsi tse senang phephetso ho tseo ba lirekising. Litsi tsena tse senang phephetso li na le matla a ho rekisa ka litefiso tse ratoang ke bona ka ntle le ho botsa mang kapa mang.

U khothaletsoa ho tlatša foromo bakeng sa hore u fumane leselinyana lena ho marang-rang a Lekhotla e leng www.lewa.org.ls. Ke u lakeletsa palo e monate ea leselinyana lena.





Karolo ea sechaba 'mokenng oa K'hamphani ea Motlakase Lesotho (LEC) ea ho nonya sechaba maikutlo ka Kopo ea nyollo ea litheko le litefiso

Phatlalatso ea litheko tsa motlakase tsa LEC tsa selemo sa 2020/21

Ka la 30 Phupu 2020, Boto ea tsamaiso ea Lekhotla la Taolo ea Motlakase le Metsi Lesotho (LEWA) le ile la phatlalatsa sephetho sa haholo letho holim'a litheko le litefiso tsa Kopo ea K'hamphani ea Motlakase Lesotho (LEC). LEC e ne boitse e kopile hore e abeloe chelete e kaalo ka M1.21 million bakeng sa Selemo sa 2020/21 e leng keketso ea 32.6% lekhohlong mekhahlelong eohle ea sekhahla sa tšebeliso ea motlakase.

LEC e hlalositse hore lintlha tse kang theko ea motlakase ka bongata (litsing tse ka ntle), tokiso le bapalleho ea thepa, litšenyehelo tsa letsatsi le letsatsi, ho tsofala hoa thepa le phaello ea thepa e le tsona tse e susumellelitseng ho teka Kopo.

Ho latela lintlha tsa molao, hang ho ba Kopo ea LEC e amoheloe, Lekhotla le ile la e phatlalatsa e le ho tsebisa basebelisi ba motlakase hore ba fane ka litlatsetso le maikutlo a ngotsoeng. Limmoka tsa sechaba li ile tsa tsoaroa literekeng tse leshome tsa naha e le mokhoa oa ho bokella maikutlo a sechaba. E ntse e le mokhoa oa ho nanabetsa Kopo ea LEC ho sechaba, phatlalatso ea eona e ile ea etsoa ka litsi tse fapaneng tsa sechaba, marangrang,

Babusi ba Litereke, Marena hammoho le Likomiti tsa Makhotla a Mathomo. Limmoka tsa sechaba li ile tsa tsoaroa literekeng tse leshome tsa naha ho tloha ka Tlhakubele 2020. Lekhotla le ne le rerile ho phatlalatsa qeto ea mapomelo holim'a Kopo ka Motšeanong 2020 empa ho qhoma hoa seoa sa COVID-19 ho ile hoa sitisa seo.

Qeto ea ho se nyolle litheko le litefiso ho bolela hore basebelisi ba litšebeliso tsa motlakase ba ntse ba tla tsoela-pela ho lefisoa ka litheko tsa 2018/19. Litheko le litefiso tsa motlakase li qetitse ho nyolloa selemong sona seo sa 2018/19. Ka hona mekhahlelo e 'meli ea litefiso le litheko e kenyelletsang khahlemetso ea batho ba sa sebeliseng motlakase o mongata e ntse e le tšebetsoeng.

Kopong ea eona, LEC e ne kopile ho nyolla litheko le litefiso ka linoko tse 32.6% mekhahlelong eohle hammoho le chelete e kaalo ka li-billion tse M1.21 bakeng sa hore e tle e phethele tšebetso ea eona ka katleho selemong sa 2020/21.

Ka tlaase mona ke boemo ba litheko le litefiso mekhahlelong eohle ea motlakase bakeng sa selemo sa 2020/21.

TAFOLE EA PELE: KANANELO EA LITEFISO TSA MATLA TSA 2020/21

Mekhahlelo ea Basebelisi ba motlakase	Litefiso tsa Matla ho kenyetsetsoa *Litefiso tsa basebelisi le kanetso ea motlakase (M/kWh)
Lifeme HV	0.2559
Lifeme LV	0.2767
Likhoebob HV	0.2559
Likhoebob LV	0.2767
Mesebetsi e akaretsang	1.6608
Malapeng	1.4782
Khahlametso ea litefiso malapeng	0.7273
Ho banesa	0.8725

TAFOLE EA BOBELI: KANANELO EA LITEFISO TSA SEKHAHLA SE PHAHAMENG TSA 2020/21

Mekhahlelo ea Basebelisi ba motlakase	Litefiso tsa Sekhahla se Phahameng sa Matla (M/kVA)
Lifeme HV	272.7953
Lifeme LV	318.6317
Likhoebob HV	272.7953
Likhoebob LV	318.6317

Khahlametso ea litefiso malapeng ke mofuta oa theolelo bakeng sa theko ea motlakase o ka tlaase ho 30kWh ka khoeli ka tefiso ea **M0.7273 Lisente/kWh**. Mofuta oa bobeli oa tefiso ke to tloaelehileng bakeng sa batho ba sebelisang motlakase o ka holimo ho 30kWh ka khoeli ka tefiso ea **M1.4782 Lisente/kWh**. Lipalo tsohle tafoleng ha li ea kenyetsetsa Lekhetso.



Karolo ea sechaba 'mokeng oa K'hampani ea Motlakase (LEC) oa Kopo ea nyollo ea litheko le litefiso.

Mekhoa ea ho fokotsa le ho laola sekahla sa tšoaetsano ea COVID-19

Lefatše le tjametsoe ke tlokotsi ea lefu la COVID-19. Linaha, Mekhatlo ea linaha le likhoebo ka kakaretso li sebetsa ka matla ho kenya tšebetsong mehato ea ho fokotsa sekahla sa tšoaetsano ea lefu lena. Lekhotla la Taolo ea Motlakase le Metsi Lesotho (LEWA) le lona le itlametse ho nka karolo tabeng ea ho fana ka malebela a polokeho le bophelo bo botle ba bohle ba amehang le sechaba. Taba ena e fihleloa ka ho hopotsa sechaba ka malebela a hlalositsoeng ke Lekala la Bophelo (MoH) le Mokhatlo oa Bophelo oa Lefatše (WHO) ele karolo ea tokomane tsa botataisi tabeng ea ho fena tšoaetsano ea COVID-19 le mafu a mang. Ka hona, Lekhotla le khothaletsa bohle ho ikamahanya le tse latelang:

- Hlapi matsoho khafetsa ka sesepa le metsi kapa ho tlotsa matsoho ka motsoako oa tlhoekiso o nang le boima ba joala ba karolo ea 70 lekholong. Ho hlapi matsoho le ho a tlotsa ka motsoako oa tlhoekiso ho bolaea kokoana hloko ea COVID-19 hape e fokotsa menyetla ea tšoaetsano;

- Boloka sebaka se bolelele ba maoto a mararo lipakeng tsa hau le batho ba bang. Ha motho e mong a khohlela, a thimola kapa a bua, a ka hasa marotholi a nang le tšoaetsano ho tsoa ka linkong kapa molomong. Ha bolelele bo sa lekana lipakeng tsa batho, ho bobebe hore marotholi a nang le tšoaetsano a fetele mothong e mong.
- Qoba libaka tse kotsi joaloka moo batho ba leng bangata, kaha ho bobebe ho fumana tšoaetsano libakeng tse joalo. Lebaka ke hobane ha ho bobele ho boloka bolelele ba maoto a mararo lipakeng tsa batho.
- Qoba ho tšoara mahlo, linko le molomo. COVID-19 e fetisetseha ha bonolo ka likarolo tseo tsa 'mele.
- Netefatsa hore uena le bohle ba u potileng le e la hloko meoloane ea tataiso e amang litaba tsa bohloeki. Hona ho bolela hore motho u lokela a ikoahela molomo le linko ka setsoe se kobiloeng kapa ka pampiri ha a khohlela kapa ha a thimola. Pampiri e sebelisitsoeng e lokela e lahloe hang ho latela meoloane ea boipaballo. Taba ena e reretsoe ho boloka motho ka mong le bohle ba mopotileng khahlanong le tšoaetsano ea lefu lena la COVID-19.
- Khothaletso ke hore bohle ba lule hae, ho tsamauoe feela ha ho hlokahele ka ha taba ena e ka thusa ho fokotsa ho ba monyetleng oa ho tšoaetsano.
- U lokela ho itšeka hang ha u hlokomela matšoa a latelang bophelong ba hau: Ho khohlela ho saeng moriting, ho tšoaroa ke hlooho, hoba le feberu, liso tsa 'metsong le bohloko ba 'mele ka kakaretso. Batla thuso e potlakileng ha u sitoa ho phefumoloha hantle e bile u bontša a mang a matšoa a boletsoeng ka holimo. Bolella ngaka ea hau ka nako ka matšoa ana e le hore qeto ea ho u thusa e etsoe ka nako.
- Lula u ithuta ka liphetoho tsa nako le nako ka mehloli e nepahetseng joaloka WHO kapa litsi tsa bophelo tse haufinyane. Litsi tsa bophelo tsa lehae li tšepetsoe ho fana ka likeletso tabeng ea kotsi ea tšoaetsano metseng eo re phelang ho eona.



Ho roala semonkoana ho molemo khahlanong le seoa sa COVID-19



Lipalo tse tsamaisang motlakase.

Lipotso tse botsoang hangata holim'a litjeo tsa motlakase

Lekhotla la Taolo ea Motlakase le Metsi Lesotho (LEWA) le fuoe mosebetsi oa ho hlahloba le ho etsa qeto holima litjeo tsa motlakase ho latela khaolo ea 24 ea molao oa Lekhotla la Taolo ea Motlakase Lesotho (LEA) oa 2002 o hlomathisitsoeng. Ho se ho tloaelehile hore tšebetso ea ho hlahloba le ho etsa qeto holima litheko tsa motlakase e etsahale selemo le selemo.

Tlhatlhobo le ho etsa qeto holima litheko tsa motlakase ke tšebetso e fihleloang ka ho amohela kopo ea tlhatlhobo, ho latela methati e lokelang, ho ithuta ka botebo likateng tsa kopo 'me qetellong e be ho fihleloa qeto ho latela kopo e entsoeng ke K'hamphani ea Motlakase Lesotho (LEC) kapa K'hamphani ea Metsi le Likhoere-khoere (WASCO).

Tse ling tsa lintlha tseo baji le sechaba ba hlokanang ho li utloisisa li hlalositsoe liratsoaneng tse latelang. Lipotso tse botsoang ha ngata le likarabo tse hlalositsoeng li thusa baji hore ba itukisetse hantle likopano tsa sechaba moo ho sekasekoang litaba tsa litheko tsa motlakase 'me ba etsa tlatsetso tse molemo. Taba kholo leselinyaneng lena ke likateng tsa litheko tsa motlakase.

1. Litjeo tsa motlakase li bolelang?

Litjeo tsa motlakase ke litheko tsa motlakase tsa khoeli le khoeli tse ipapisitseng le sekhahla se itseng, seo hangata se nyolohang ka selemo. Litheko tsena li thusa ho kala lintlha tseo eking tšebeliso le litjeo tsa bokhoni.

2. Ke lipehelo life tsa molao tse sebelisoang sebakeng sa ho hlahloba litheko tsa motlakase

Ho latela Molao oa Lekhotla la Taolo ea Motlakase oa 2002, o hlomathisitsoeng, bafani bohle ba litšebeliso tsa motlakase ba lokela etsa kopo ea ho hlahloba sekhahla sa litheko tsa motlakase ho LEWA. Kopo e lokela ho kenyelletsa lintlha tsohle tse amanang le sekhahla sa litjeo sebakeng sa litšebeliso, tse kang ho beheletsa (deposits), litšenyehelo tse kekeng tsa buseletsoa, litšenyehelo tsa khoeli, 'moho le lipallo le lipehelo tšebetsong ea phano ea litšebeliso. Sena se kenyelletsa litokelo le litharollo tse fumanehang moo ho sebelisitsoeng litheko tse sa hlohonolofatsang, litlitlebo, kapa ho se khotsofalle litšenyehelo tsa tšebeliso kapa phano ea litšebeliso ka bo eona.

3. Ke methati efeng e latelang ho hlahloba litheko tsa motlakase?

Methati eo LEWA e lokelang ho e latela ha e hlahloba litheko tsa motlakase e lokolisitsoe ka hare ho tokomane ea LEWA ea Methati ea ho etsa Kopo le ho Hlahloba Litheko tsa Motlakase le Metsi (LEWA Tariff Filling and Review Procedure for Electricity and Water Tariffs). Methati ena e fana ka tataiso e hlakileng e lokelang ho lateloa ke Lekhotla le basebetsi ba teng ha ho hlahloba

joa kopo e bile ho etsoa likhohaletsa ho boto mabapi le qeto kapa litlatsetso kopong e entsoeng. Methati ena e boela e tsebisa bakopi lefapheng la motlakase le metsi holima mehato e nkoang ke Lekhotla 'me e ba khohaletsa ho etsa kopo ka tsela e kekeng ea baka tiehiso. Sebakeng sa mehato ena e lateloang, 'mali a ka chakela leqephe la LEWA la marang-rang ho :

www.lewa.org.ls/tariffs/Procedures/lesotho_tariff_filing_procedure-revised.pdf

4. Ke lintlha life tseo LEWA e ipapisang le tsona ho fihlela qeto holima litheko tsa motlakase?

Liqeto holima litheko tsa motlakase li fihleloa ho latetsoe likhaolo tsa molao, ho kenyelletsa molao oa Lekhotla la Taolo ea Motlakase oa 2002 o hlomathisitsoeng, 'moho le litokomane tsa tsamaiso kapa tataiso tse thehiloeng ke Lekhotla. Lekhotla le ela hloko tse latelang pele qeto holima litheko e fihleloa: litjeo tsa theko ea motlakase ka bongata (ho kenyelletsa tokiso ea marang-rang, mafura a diesel le liloetsi tse sebelisoang Semonkong).

Lintlha tse ling ke litjeo tsa LEC tsa tšebetso tsa letsatsi le letsatsi (ho kenyelletsa litjeo tsa basebetsi, tahlehelo ea boleng ba thepa, litjeo tsa tšebetso tsa letsatsi le letsatsi, le litjeo tsa lakesense ea LEWA). Lekhotla le boela le talima sekhahla sa kuno thepeng e sebelitseng. Moruo oa naha (ho ipapisitsoe le lintlha tse kang bokhoni ba theko ea motlakase le nyollo ea theko ea thepa) le ona o eloa hloko.

5. Na maikutlo a sechaba a eloa hloko ha ho etsoa qeto holima litheko tsa motlakase?

Maikutlo a sechaba ke karolo ea bohlokoa ea mantlha ha ho etsoa qeto holima litheko tsa motlakase. Ho latela khaolo ea 24 ea molao oa Lekhotla la Taolo ea Motlakase Lesotho oa 2002 o hlomathisitsoeng, Lekhotla le lebelletsoe ho fumana maikutlo a

sechaba mabapi le hore na kopo ea ho hlahloba litheko tsa motlakase e ea utloahala kapa chee. Ka hona, Lekhotla le tlameha ho mamela maikutlo a sechaba pele qeto e fihleloa. Lekhotla le amohetse melaoana ea tsamaiso e kenyelletsang ea ponaleto. Ka hona, Lekhotla ka linako tsohle le netefatsa hore tšebetso ea lona ea taolo e lula e na le ponaleto 'me sechaba, litsi tse laoloang le bohle ba amehang ba na le bolokolohi ba ho kenya letsoho. Tokomane ea liqeto holima litheko tsa motlakase le tlhokomeliso holima litheko e netefatsa hore maikutlo a sechaba a na le susumetso holima liqeto tse nkoang ke Lekhotla. Lintlha tse ling li ka fumanoa ho: www.lewa.org.ls/tariffs/lec_tariff.pdf

6. Ho boleloang ka litefiso tsa motlakase ka mekhahlelo e 'meli?

Sebopeho sena sa litheko tsa motlakase se hlalositsoe ke LEWA 'me se ama baji ba malapeng. Lekhotla le hlohonolofalitse sebopeho sena sa litheko sa mekhahlelo se tsamaea le litefiso tsa bophelo sebakeng sa baji kapa basebelisi ba motlakase bohle ba malapeng. Mekhahlelo oa pele o sebetso ho li-unitsi tse 30 kWh tse sebelisitsoeng ke baji ba malapeng ka tefiso ea M0.7273/kWh nakong ea khoeli. Mekhahlelo oa bobeli ke o tloahelehileng oa theko ea motlakase o fetang 30 kWh ka tefiso ea M 1.4782/ kWh (ho sa kenyelletsoe VAT).

Ho fumana litaba kapa litlhakisetsa ka tšebetso ea LEWA, u ka chakela leqephe la rona la marang-rang ho www.lewa.org.ls, kapa oa ngolla Lekhotla ho secretary@lewa.org.ls kapa oa letsetsa +266 22312479.



Mongoli e Moholo oa Lekala la Matla le Bolepi o etela LEWA

Mongoli e Moholo (PS) oa Lekala la Matla le Bolepi (MEM) e leng Monghali Tankiso Phapano o ile a etela Lekhotla la Taolo ea Motlakase le Metsi Lesotho (LEWA) ka sepheo sa boithuto.

Monghali Phapano o ne a sebetsa Lekaleng la Tšireletso le Polokeho ea Sechaba pele a ka fuoa thomo e ncha ea ho tla MEM. Eena ka kotloloho o hlaha leboatoeng la Mosalemane.

Mookameli oa LEWA e leng Monghali Motlatsi Ramafale o ile a amohela Mongoli e moholo ka thabo moo teng a ileng a hlalosa hore ke tlotla e kholo ho LEWA ha e le mona a tlo hata mabala ka nako e khutšoane a fihlile tšebetsong.

Puong ea hae Monghali Ramafale o ile a hlalosetsa Mongoli e moholo ka mosebetsi le sebopeho sa LEWA hammoho le litsi tse boliseng ba eona lefapheng la motlakase le metsi. O ile a boela a tsoaela ka hore Lekhotla le tla lula le kopa boeletsi le kananelo ea litokomane tsa tšebetso ofising ea hae.

Monghali Phapano o ile a lebohela kamohelo e mofuthu eo a e filoeng le hore eena ke motho ea ratang ho kopana le batho sefahleho ka sefahleho. O ile a hlalosa hore eena o ikemiselitse ho ntšetša pele lipheto, likamano tse mofuthu hammoho le bosebeletsi bo tsoileng matsoho phanong ea litšebetso.

“Ke thabile haholo ho utloa hore ke PS ea pele ka hara Lekala la MEM ea ho etela Lekhotla lena. Tšebetsong eaka ke tla etsa sohle se matleng a ka ho le fa tšebetso ka moo matla a mphang ka teng,” ho riatso Monghali Phapano.

LEWA ke sithi sa ‘muso se ikemetseng se ikarabellang ho Lekala la Matla le Bolepi (MEM) hammoho le Lekala la Metsi (MW).



Monghali Motlatsi Ramafale a amohela, Monghali Tankiso Phapano.



Monghali Tankiso Phapano ketelong ea hae ea semmuso LEWA.

Methati e lateloang ho rarolla litletlebo

Ho latela likhaolo tsa 22 (j) le 105 tsa molao oa Lekhotla la Taolo ea Motlakase Lesotho oa selemo sa 2002, Lekhotla la Taolo ea Motlakase Lesotho oa selemo sa 2002, Lekhotla la Taolo ea Motlakase le Metsi Lesotho (LEWA) le fuoe matla a ho rarolla litletlebo tse lipakeng tsa ba fuoeng mangolo a tšebetso le basebelisi ba litšebeliso, moo bafani ba litšebeliso ba hlotsoeng ho rarolla litletlebo ho latela methati ea bona ea tharollo ea litletlebo. Lekhotla le lebelletsoe ho kenya tšebetsong melao ea tataiso tšebetsong ea tharollo ea litletlebo.

Tsela eo K'hamphani e rarollang litletlebo tsa baji ka teng e ka ama tsoelo-pele ea khoebo (Robert-Lombard, 2011). Ka hona, ho mamela ha moji a teka tletlebo ea hae e bile K'hamphani kapa setsi se bontša kutloisiso litabeng tse tekoang, ho bokella lintlha tsa bohlokoa tletlebong, ho bontša kutloelo bohloko ha ho sebetsanoa le tletlebo le ho latella tletlebo le tharollo ea eona, ke mokhoa o nepahetseng oa ho sebetsana le litletlebo tsa baji. Ka tsela e tsoanang, ba fanang ka litšebeliso le bona ba fuoa monyetla o lekanang oa ho teka lehlakore la bona la litaba holima tletlebo, ele monyetla hape oa ho fan aka maikutlo holima tletlebo. Ka hona, Lekhotla le hlahisitse meoloane ea tharollo ea litletlebo e kenyelletsang lintlha tsena tse boletsoeng tsa bohlokoa. Methati ena ea tharollo ea litletlebo e hlalositsoe liratsoaneng tse latelang:

Tekolo bakeng sa ho hlahloba hore litletlebo ke tse lokelang ho sebetsoa ke Lekhotla

- Pele u ka teka tletlebo ea hau ho LEWA, netefatsa hore 'moko taba oa tletlebo o ikamahanya le litšebetso tse laoloang ke Lekhotla. Litšebeliso tsena li ka kenyelletsa ka hara tse ling besebeletsi, pataliso ea litšebeliso, litšebeliso tsa phephelo e ncha, ho khaoleloa litšebeliso tsa phephelo le ho khutlisetsa phephelo, litaba tsa limithara, boleng ba metsi le motlakase le ho khaoha hoa litšebeliso;
- Tletlebo e lokela e be e ile ea tekoa ka mongolo ho K'hamphani ea metsi le likhoerekhoere (WASCO) kapa K'hamphani ea motlakase Lesotho (LEC); le
- Hore tletlebo e be e ile ea sebetsoa ke litsi tse laoloang ke Lekhotla empa joale molli a ntse a sa khotsofala kapa tletlebo e sa sebetsoaho hang.

Tse hlokalahalang hore tletlebo e amoheloe

- Tletlebo e ka tekoa ka mongolo kapa ka molomo. Ha e tekoa ka molomo, Lekhotla le lokela ho thusa molli ho tlatsa foromo ea tletlebo;
- Tletlebo e lokela e felehetsoe ka lintlha tsa boitsebiso ba molli tse tla thusa hore lipuisano li be bobebe ha ho ntse ho sebetsoa tletlebo e joalo;
- Motho ea tletlebang a ka atamela liofisi tsa LEWA ho teka tletlebo. Le ha ho le joalo, tletlebo e ntse e ka tekoa ho sebelisoa marang-rang (secretary@lewa.org.ls) moo molli a sa khoneng ho fihla likantorong tsa LEWA. Likhokahanyo tsa marang-rang a LEWA joaloka Facebook, Twitter hammoho le ka mohala oa (+266) 22 312 479 li ka sebelisoa. Litaba tse thusang baji ka tataiso ea ho teka litletlebo li fumaneha ho www.lewa.org.ls. Bohle ba lumelletsoe hore ba ka fumana lintlha tseo ba li hlokanng liofising tsa LEWA.

Litataiso tse akaretsang

- Molli a ka sebetsana le litaba tsa tletlebo ea hae ka boena kapa a emeloa ke motho e mong.
- Lekhotla le tsebisa setsi se laoloang ka tletlebo 'me e be sona se koptjoa ho fana ka lehlakore la teng la litaba mabapi le tletlebo. Lekhotla le boela le tsebisa molli hore na tletlebo e tla sebetsoa le ho rarolloa ke Lekhotla kapa chee.
- LEWA e etsa lipatlisiso ka tletlebo, 'me hang ha lipatlisiso li fihletse pheletso kapa qeto e ea etsoa 'me e be e tsebisoa molli le setsi se amehang.
- Haeba Lekhotla le bopile maikutlo a hore tletlebo e rarolloe ka mokhoa oa bokena lipakeng (mediation), mahlakore ka bobeli e ba a tla bitsetsoa phuthehong 'me e be mahlakore a thusoa ho fihlela tharollo holima tletlebo.
- Moo mahlakore ka bobeli a sitoang ho fihlela tharollo ea tletlebo nakong ea phutheho ea bokena lipakeng, tletlebo e fetisetsoa ho Boto ea Lekhotla hore e fane ka tharollo ea moshoelella eo le eona e ntseng e ka hlahlojoa makhohleng a molao.
- Ka morao kapa nakong ea lipatlisiso, moo ebang ho bonahala hore tletlebo e se e sa tsoarehe, kapa moo setsi se laoloang se bopileng maikutlo a hore tletlebo e rarollotsoe, tletlebo e joalo e ba e nkoa e fihletse pheletso 'me e koetsoe ke LEWA.
- Qeto e fihletsoeng e lokela e kenyelletse lintlha tse akaretsang tsa tletlebo, karabo e fanoeng ke setsi se amehang holima tletlebo, mabaka a susumelitseng liqeto tsa Lekhotla.

LEWA e fanyeha phatlalatso ea Kopo ea WASCO ea ho nyolla Litheko le Litefiso tsa Selemo sa 2020/21

Ka la 28 Phupu 2020, Boto ea tsamaiso ea Lekhotla la Taolo ea Motlakase le Metsi Lesotho (LEWA) e ile ea khina phatlalatso ea sephetho sa litheko le litefiso tsa 2020/21 tsa K'hamphani ea Metsi le Likhoerekhoere (WASCO) ho fihlela ka la 31 Tlhakubele 2020 'me litefiso tse teng li ntse li le tšebetsong. WASCO e ile ea tlisa Kopo ea eona ho Lekhotla khoeling ea Tlhakola 2020.

WASCO e ne Kopile ho nyolla litheko le litefiso tsa litšebeliso tsa metsi ka linoko tse tharo (3%) lekholong bakeng sa tšebeliso ea malapeng hammoho le Keketso ea Chelete ea Tšebetso (RR) e kaalo ka milione tse M239.85 bakeng sa 2020/21. Kopo e ne e boetse e kopile tlhahlobo ea mekhahlelo ea basebelisi ba metsi malapeng ho latela tšebeliso ea bona hammoho le phokotso ea Litefiso tsa Khoeli le Khoeli (SCs).

Lekhotla le hlalobile Kopu ena le ipapisitse le Tokomane ea Lekhotla ea Methati ea Tlhahlobo ea Likopo tsa Motlakase le Metsi. Ho latela molao hammoho le methati ea taolo ea tsamaiso, Kopu e tekiloeng ho Lekhotla e lokela ho tekoe ka pela sechaba bakeng sa tlhahlobo ekasitana le phumantso ea maikutlo.

Ka Tlhakubele 2020, Boto ea Tsamaiso ea Lekhotla e ile ea etsa qeto mabapi le ho phethela Kopu ea WASCO ea ho nyolla litheko le litefiso. Qeto e fihletsoeng e ne e phuthetse lintlha tse kang phatlalatso ea limmoka tsa sechaba le matsatsi ao limmoka li tlang ho tsoaroa. Leha ho le joalo, ho qhoma hoa sephetho sa COVID-19 le khino

ea motsamao ke 'Musu ka Tlhakubele 2020, li ile tsa susumetsa hore limmoka tsa sechaba li se tsoaroe.

Ka la 03 Phuptjane 2020, Boto ea tsamaiso ea LEWA e ile ea etsa qeto ea ho beha molatsa Kopu ea WASCO ka likhoeli tse tharo ho filela ka Phato 2020. Sena se fihletsoe ka lebaka la boima ba melao ea limmoka tsa sechaba toantšong ea COVID-19 kaha limmoka li ne li sa tsoanele ho feta batho ba 50.

Qetong ena, Boto ea tsamaiso e ile ea ela hloko lintlha tse 'maloa tse kang kameho ea lefapha ka lebaka la COVID-19 hammoho le boemo ba moruo. Hará tse ling, Lekhotla le etse hloko hore:

- Pokello ea maikutlo a sechaba holima Kopu ha e ea etsoa ka lebaka la COVID-19;
- Kopu ea WASCO ea ho kenya tšebetsong mokhahlelo o mocha oa litefiso tsa basebelisi ba metsi malapeng ha o latele meralo ea Tlhakola 2005 oa Lesotho litabeng tsa Metsi le Bohloeki, e khahlanong le seo ba se kopang;
- Ka morero oa Lowlands Water Development Project Phase II (LLWDP II), WASCO e tla fumana chelete e kaalo ka M8 million (\$500 000.00) holima litlhoko tseo LEWA e tlang ho lumellana le K'hamphani ka tsona.

Tafoleng e ka tlaase mona ke boemo ba litefiso tsa litšebeliso tsa metsi le likhoerekhoere.

LITEFISO TSA K'HAMPHANI EA METSI LE LIKHOEREKHOERE TSA 2020/21

Mekhahlelo ea Basebelisi	Theko ea Unit ka ngoe ka cubic ka ngoe ea meter (M/kl) ¹ ho kenyelletsoa le tifiso ea tšebeliso ²	Tifiso ea Khoeli ka 'ngoe (M/khoeli)
Basebelisi ba Malapeng (Litefiso le Litheko tsa Metsi)		
Band A (0 - 5kl)	5.53	-
Band B (>5 - 10kl)	9.39	45.05
Band C (>10 - 15kl)	16.52	45.05
Band D (>15kl)	22.78	45.05
Lipompo tsa sechaba	7.50	-
Basebelisi ba Malapeng (Litefiso tsa Metsi le Likhoerekhoere)		
Likhoebotse nyane le tse kholo	15.03	433.30
'Muso	15.03	299.98
Likolo	14.90	299.98
Likereke	14.90	216.66
Litefiso tsa litšebeliso tsa Likhoerekhoere		
Domestic: both water borne ¹ and water borne ²) and Non-domestic	9.70	-
Likotsi and Qualing Clinics	48.86	-
C and Y Sewer	1.01	-

¹ M/kl=Maluti litara ka ngoe; 1 kl = 1,000 litres. ² Lekhetso la basebelisi ba litšebeliso = M0.2311/kl. Lipalo tsena ha li ea kenyelletsa VAT.





Tseba haholoanyane ka litaba tsa taolo: Molaoana oa lilaksense tsa motlakase-Lesotho Electricity Authority (Application for Licences) Rules, 2012

Lefapheng la Phepelo ea Motlakase ea Lesotho (ESI) ho na le mesebetsi e mengata e laoloang e thathamisitsoeng tlasa karolo ea 41 ea Molao oa Motlakase oa Lesotho, 2002, o hlomathisitsoeng. Mesebetsi ena e kenyelletsa ho tlhahiso, ho tsamaisa ka likhoele tse kholo, ho qhalakanyoa ka tse katlasana le ho fepela motlakase. Kahoo Lekhotla la Taolo ea Motlakase le Metsi (LEWA) le filoe matla tlasa Karolo ea 50 ea Molao, ho fana ka lakesense ho motho ofe kapa ofe, ea lakatsang ho etsa mesebetsi o laoloang.

Tlhahiso, phetiso, kabo le phepelo ea motlakase li nkuoa joalo ka likhoebo tse arohaneng ebile ke mesebetsi e laoloang. Ka lebaka leo, Lekhotla le thehile melaoana e tataisang batho kapa litsi tse batlang ho etsa likopo tsa lilaksense tse bitsoang Lesotho Electricity Authority (Application for Licences) Rules, 2012, ho netefatsa hore likopo tsa mesebetsi e laoloang li latela mokhoa o behiloeng.

Motho ofe kapa ofe ea lakatsang ho etsa ts'ebetso efe kapa efe e laoloang ka motlakase e boletsoeng kaholimo o lokela ho etsa kopo ho Lekhotla mme kopo e joalo e lokela ho tsamaea le litefiso tse behiloeng. Kopo e lokela ho tekeneloa ke mokopi kapa motho ofe kapa ofe ea saenneng molemong oa mokopi mme e tsamaee le kakaretso e fanang ka litla-morao tse ka bang teng tsa khoebo e joalo tikolohong le bophelong bo botle ba batho. Ntle le moo, kopo e lokela ho tlisoa ka mokhoa o boletsoeng ka molao. Kamor'a moo Lekhotla le tla phatlalatsa kopo e felletseng nakong ea matsatsi a leshome le metso e mene (14) ea ho e fumana. Baahi ba sebaka seo se ka angoang ke khoebo e reriloeng ba lumelloa bonyane nako ea matsatsi a 28 kamora ho tseba ka kopo ho hlophisa litlhahiso tsa bona tse ngotsoeng kapa khanyetso khoebong e reriloeng e lokelang ho etsoa sebakeng sa bona sa bolulo.

Kamora ho fana ka lakesense ho mokopi, lakesense o lebelletsoe ho latela melao le lipehelo tsa laesense. Ho hloleha ho ikamahanya le lipehelo tsa laesense ho ka etsa

hore ho nkuoe bohato ba khalemelo kapa ketso eo Lekhotla le ka bonang li lokela, ho tloha ka ho fuoa likotlo ho is ho hlakoloeng ha lakesense.

Maemo a lakesense a kanna a fetoha, a fetoloa, a ntlafatsoa kapa a ntlafatsoa ho latela lipehelo tse boletsoeng ho laesense kapa ka lipehelo tsa molao o lumellang.

Ho na le maemo moo Lekhotla le ka etsa qeto ea ho bebofatsa lipehelo tsa batho ba itseng ho fuoa lakesense. Mona ka tlase ke mekhelo e joalo:

- Motho ea hlahisang MegaWatts (MW) tse peli (2) kapa ka tlase tsa motlakase;
- Motho ea fanang ka motlakase oa li-kilowatts (kWh) tse mashome a mahlano (50) kapa tlase ho 'ona bakeng sa ts'ebeliso ea lapeng;
- Motho ea sebelisang motlakase eo a iphehlelang ona bakeng sa ts'ebeliso ea hae kapa a fuoa motlakase oo ke motho ea nang le lakesense ;
- Motho ea hlahisang le ho fana ka motlakase ho motho a le mong ea sets'eng se le seng le seteishene sa tlhahiso ea motlakase; le
- Motho e mong le emong joalokaha Lekhotla le ka lokolla.

Ho bohlokoa ho hlokomela hore Lekhotla le fane ka laesense ea phehlo ea motlakase ho Morero la Nts'etsopele ea Lihlaba tsa Lesotho (LHDA) ka setsi se 'Muela, eleng 'Muela Hydropower Plant (MHP). Khamphani ea Motlakase ea Lesotho (LEC) e filoe Lakesense ea Phetiso, Tsamaiso le Phepelo ea. Lefapha la Matla (DoE) le filoe tumello ea ho se phethahatse merero ea phepelo ea motlakase ntle ea laesense (Exemption).

Ho ea ka molao, tlhahiso-leseling e khetheleng e ea hlokalala ha mokopi a batla ho etsa likarolo tse laoloang (likhoebo) tsa (ESI) joalo ka ha ho bonts'itsoe katlaase mona.

1. Tlhahiso-leseling e hlokalalang bakeng sa lakesense ea Phehlo ea Motlakase (generation)

- Tlhaloso sa 'nete e felletseng ea sebaka sa tlhahiso ea setsi sa phepelo;
- Sebaka se reriloeng se hlalosang mofuta le nts'etsopele e reriloeng;
- Lebitso la seteishene sa phehlo (mohlala MHP);
- Palo ea liteishene tsa tlhahiso ea motlakase tse tla sebetsoa;
- Hore na seteishene se tla hokeloa litsi tse ling tsa tsamaisong ea phetisetso;
- Letsatsi leo seteishene se tla qala ts'ebetso ka lona;
- Matla a lebetsoeng le a kakaretso (MW) a lebelletsoeng ntle le motlakase o sebelisoang seteisheneng;
- Bolelele ba nako eo seteishene se tla ba ts'ebetsong ka lona;

- Bokhoni ba uniti e 'ngoe le e 'ngoe e fehlang kahar'a setsi;
- 'Mapa o bontsang ka botlalo sebaka sa seteishene; le Litokisetso tsa ho latela maemo a laesense.

2. Tlhahiso-leseling e hlokalalang bakeng sa lakesense ea Phetiso (transmission)

- Tlhaloso ea sebaka sa 'nete / se reriloeng sa likhoele tsa motlakase le likaroloana tse bopileng sistimi (system) ea phetiso;
- Sebaka seo likhoele li tla beoa ka tlas'a lefaats'e ;
- Boima ba motlakase o tla ba likhoeleng tsa motlakase;
- Lintlha tsa moo motlakase o tla tsoa ho eena bakeng sa phetisetso;
- Ho khetholla lintlha tseo mokopi a lebelletseng ho fumana motlakase ho tsona;
- Boholo ba motlakase o lokelang ho amoheloa le ho fetisoa;
- Ho khetholla lintlha tsa khokahano le lits'ebetso tse ling tsa phetisetso;
- Litokisetso tsa metering tse reriloeng;
- Setsoantso se le seng sa sistimi ea phetisetso; le Litokisetso tsa ho latela maemo a laesense.

3. Tlhahiso-leseling e hlokalalang bakeng sa lakesense ea Phepelo ea motlakase (Distribution/ supply)

- Tlhaloso ea sebaka sa 'nete / se reriloeng sa likhoele tsa motlakase le polante le mekhoha eo mokopi a tla fana ka eona;
- Ho hlalohanya likhoele tse lokelang ho ahoa le tse se ntse li le teng;
- Karolo ea sistimi e ke keng ea ba ea mokopi;
- Hore na likhoele tsa phepelo tseo mokopi a rerileng ho li aba molemong oa phepelo li tla hokelloa motlakase o moholoanyane (transmission) hokae tsamaisong ea phetisetso;
- Lintlha tsa motho eo mokopi a rerileng ho fumana motlakase ho eena;
- Palo e lekantsoeng ea bareki ea sekhahla sa tsebeliso ea motlakase (Maximum demand);
- Lintlha tsa likhakanyo tse hakantsoeng ka bophahamo ba motlakase khokelong e 'ngoe le e 'ngoe;
- Lintlha tsa matla a maholo (MVA) tse lebelletsoeng ho ba teng le ho sebelisoa seteisheneng;
- Lintlha tse bonts'ang hore sistimi ea kabo ea motlakase (distribution) e tla sebetsoa ka polokeho; le
- 'Mapa o khethollang sebaka seo ts'ebeliso e amanang le sona, ho kenyeletsoa le litselana tsa li-cable le li-substation tse amanang le tsona.

Bakeng sa litlhaloso tse mabapi le tlhahiso-leseling ena ikopanye le LEWA.

Falla Seboko e ne e le moratoa ke bohle

Lekhotla la Taolo ea Motlakase le Metsi Lesotho (LEWA) le ile la etsa mokete oa semetletsa e le ho fonanisa Monghali Falla Seboko, ea qetileng lilemo tse robeli a le sebeletsa. O fihlile LEWA e le ofisiri ea Tlhahlobo ea Litšebeliso tsa Metsi (PA-W) ‘me ea e ba mookameli ha selemo seo se feela.

Monghali Seboko ke motho ea pelo e jehang ea neng a ena le mahlaha-hlaha tšebetsong ea hae hape e bile e le ramahlale oa ho tseptjoa. O phethetse lengolo la hae la mahlale a thuto e phahameng (BSc) ho tsoa University of Hertfordshire, London ka 1995. Ho phethahatsa mosebetsi ka matjato le ka bohlale e bile lintho tseo a ithutile tsona ho tloha a le lithutong tse tlaase kaha a qalile ho sebetsa lilemong tseo.

O qalile tšebetso ea hae K’hamphaneng ea Metsi le Likhoerekhoere (WASCO) eo ka nako eo e neng e bitsoa Lekala la Metsi. E meng ea mesebetsi ea hae joalokaha e ne e le Mookameli oa Lefapha la Metsi LEWA, e ne e le ho akofisa le ho netefatsa hore meralo ea lefapha la hae e ea phethahatsoa. Har’a tse kholo tšebetsong ea hae o ile a hlalisa litokomane tsa taolo ea metsi metseng ea litoropong hammoho le litšebeliso tsa likhoerekhoere.

Ea neng a buelella Lefapha la Taolo ea Metsi e leng Mofumahali ‘Mapaseka Makhaba, o ile a leboha le ho babatsa tšebetso e mofothu hammoho le tataiso e manoni eo ba e filoeng boliseng ba Monghali Seboko. O ile a boela a tsoaela ka hore Monghali Seboko o ba ratile ho etsa mesebetsi ea bona ka boitelo le boikitletso, ho hlonepha nako hammoho le ho apara ka makhetha.

“Tšebetso ea hau eo e bileng matla a Lefapha la rona bakeng sa mesebetsi o mongata o re tjametseng e tla lula e hopoleha. Lefapha la rona le keke la hlola le tsoana le pele ka ntle ho uena. Rea leboha ka sohle ‘me Molimo a u ruhise molemo o sa feleng. Karohano ha se ntho e bobebe empa tsohle li tla lula li hahetse lipelong tsa rona. Rea



Eng. Falla Seboko

tseba hore ho ja ha se ka seoa sena sa COVID-19, u ka be u re bontša menyakoe le metjeko eo u tummeng ka eona” ho rialo Mofumahali Makhaba.

Haa tsoaela fonanisong ea hae, Monghali Seboko o ile a lebisa liteboho ka tšebetso eo basebetsi ‘moho ba mo fileng eona tšebetsong ea hae.

“Ke ile ka hana mesebetsi e hlamatsehang ho tsoa linaheng tsa machaba e le hobane ke utloa ke rata ho sebeletsa Lesotho kaha e nthutle. Har’a tse ngata tseo ke leng motlotlo ka tsona ke hore ke tloha LEWA mona e le katleho e kholo, ke hore re fumane tlotla pele ka tšebetso ea ho laola litheko le litefiso hloahloeng ena. Ka hona ke lelakaletsa bohle mahlohonolo le ntlafalo tšebetsong ea lona,” ho hlalosa Monghali Seboko.

Mookameli oa LEWA, Monghali Motlatsi Ramafole o ile a lebisa liteboho ho Lekhotla ho mo fa monyetla oa ho sebetsa le batho ba ho tsoana le Monghali Seboko. O ile a mo hlalosa e le setsibi seo motho a ka itšetlehlang ho sona, moboloki oa nako hammoho le ho ba motho ea tlatsang batho ka matla kaha a etsa mesebetsi oa hae ka boqhetseke bohle le ho thahasella ho thusa ba bang. Monghali Ramafole o ile a leboha Monghali Seboko ka tšebetso e tsotehang ho fihlela motsotsong oa ho qetela.



Phano ea limpho ho Eng. Falla Seboko (letsotlatsi le letona).